



ANEXO II - PROGRAMA

I.- CRITERIOS DE PRIORIDADE PARA O ACCESO AO PROGRAMA

O Equipo de Integración Familiar da entidade traballará simultaneamente cunha poboación media de 136 familias en toda a comunidade, distribuídas por provincias en función das necesidades detectadas en cada provincia, prestando especial atención á área de reunificación familiar para evitar así, na medida do posible, a utilización e/ou extensión do recurso de acollemento residencial.

Criterios de selección das familias:

1. *Familias con nenos e nenas residentes en centros de acollida ou en acollemento familiar. Área de Reunificación Familiar.*

- Necesidade das familias dunha intervención directa nos seus núcleos familiares para favorecer un rápido e eficaz desinternamento, o que se levará a cabo coa coordinación do persoal educativo e da dirección do centro*
- Potencial reversibilidade da situación que motivou o internamento dos nenos e nenas*
- Existencia de membros da familia extensa en disposición e con posibilidades de colaborar para modificar a situación que favoreza o retorno dos nenos e nenas ao fogar.*
- Prestarase atención prioritaria aos nenos e nenas internados en centros residenciais fronte aos que estean en acollemento familiar.*

2. *Familias con nenos e nenas en situación de risco. Área de Preservación Familiar.*

Necesidade das Familias en situación de risco dunha intervención especializada para evitar o internamento do neno ou nena nun centro de protección e posibilitar a continuidade da convivencia coa súa familia en condicións de seguridade e afecto, o que se levará a cabo cos servizos sociais dos concellos.

3. *Familias con grave deterioro familiar con nenos e nenas en situación de desprotección, que seguen a manter relacións cos seus fillos e fillas. Área de Funcionalidade Familiar.*

- A área de “funcionalidade familiar” utilizarase para aquelas situacións onde exista un grave deterioro familiar, poderase empregar como intervención*





previa á derivación as outras dúas áreas, facilitando de esta maneira un maior tempo de intervención ás familias que permita a consecución de obxectivos. Reservarase para un número limitado de casos, sempre inferior aos casos traballados en preservación familiar e reunificación familiar, pola definición do programa de integración, e a necesidade de priorizar a intervención que garanta o traballo esencial de recuperación das condicións protectoras no menor tempo posible.

- Valoraránse as necesidades das familias gravemente deterioradas que non poden recuperar condicións protectoras nun período de dous anos, pero das que se considera a necesidade dunha intervención para dotalas dunha estrutura e funcionalidade mínima, que lles permita ser unha influencia positiva para os seus fillos e fillas, cando manteñen os contactos por estar aqueles en acollemento residencial ou noutros programas, ou pasar posteriormente ás áreas de Preservación e Reunificación, segundo as necesidades.*

En todos os casos é necesaria a dispoñibilidade da familia para participar no programa e considérase elemento determinante da eficacia do programa que a intervención se produza no momento máis próximo posible ao da detección da necesidade.

II.- FASES DO PROGRAMA

Comúns ás tres áreas de intervención.

1.- FASE DE ADMISIÓN. Recepción da demanda, recollida de información sobre o caso derivado (composición do núcleo familiar, motivo do expediente, situación actual do caso, área de intervención,..) , presentación da familia, acordo da familia para a participación voluntaria no programa, designación do persoal técnico responsable do caso, sinatura de consentimento para o tratamento de datos persoais. A duración desta fase non debe ser superior a 2 meses.

2 – FASE DE ANÁLISE E ELABORACIÓN DO PLAN DE ACTUACIÓN. Establécese un período de 4 meses para analizar a situación familiar actual, valorar a información aportada na admisión, completala coas entrevistas pertinentes á familia e a outros axentes e referentes claves do seu contexto, e coa aplicación de instrumentos de valoración e análise. O obxectivo de esta fase é coñecer en profundidade a problemática e elaborar o plan de actuación (PA) axustado as necesidades de cada familia. Dito plan establecerá a estratexia de intervención a seguir, os obxectivos a traballar, as áreas de intervención, os resultados esperados e os procedementos e





prazos de revisión dos obxectivos e do propio PA. Este plan de intervención será consensuado coa familia para garantir a máxima colaboración e proactividade

3 – FASE DE INTERVENCIÓN. A intervención ten como finalidade aplicar as estratexias e técnicas necesarias para mellorar o funcionamento familiar e persoal, xerando cambios en toda a estrutura e dinámica familiar, de xeito que se consiga un contorno familiar protector para os fillos e fillas, conforme os obxectivos fixados no PA.

Os tipos de Intervención que aplicamos son os seguintes:

- Intervención Psicosocial: ten por obxecto achegar estratexias que melloren o funcionamento persoal, familiar e social.*
- Atención Infantil: ten por obxecto garantir a convivencia familiar dos nenos e nenas en condicións de seguridade, estabilidade e afecto.*
- Educación Familiar: ten por obxecto a adquisición por parte das familias de habilidades e hábitos imprescindibles para cubrir as necesidades dos nenos e nenas..*
- Terapia familiar: ten por obxecto axudar a solucionar problemas psicolóxicos, relacionais e condutuais das persoas participantes no programa.*
- Apoio familiar: ten por obxecto proporcionar reforzo suplementario ás familias a través de acción de reforzo personalizado segundo as necesidades, a modo de apoio escolar ou respiro familiar, prestado por persoal voluntario da Fundación Meniños.*

4 - SEGUIMIENTO DE ACTUACIÓN. Unha vez posta en marcha a intervención, establécese un procedemento de vixilancia e seguimento do Plan de Actuación (PA) para garantir que se cumpran os obxectivos sinalados e que todas as intervencións se axustan aos obxectivos propostos.

O seguimento sobre o PA é trimestral: cada 3 meses a persoa responsable do equipo de traballo revisa o grao de cumprimento dos obxectivos recollidos e as actuacións que se levaron a cabo para acadalos, establecendo os mecanismos de corrección e fixación de novos obxectivos de ser necesario. Este seguimento quedará reflectido nos formularios e rexistros correspondentes.

5 - ENTREGA. Rematada a intervención, elabórase o informe final que conterá a síntese do traballo realizado no Plan de Actuación: valoración da consecución dos obxectivos establecidos, cumprimento co plan de traballo, situación familiar actual e grao de protección en que se atopan os nenos e nenas e valoración global emitida pola persoa responsable do caso.





6 - SEGUIMIENTO TRAS A BAIXA. Unha vez rematada a intervención levarase a cabo un seguimento dos casos aos 3, 6, 12 e 18 meses tras a baixa no programa co fin de obter información que permita coñecer e reforzar a situación de protección dos casos traballados, e reflectirase esa información no rexistro de seguimento post- baixa.

O período de intervención máximo con cada familia e de 2 anos. Excepcionalmente, pódese prolongar a intervención con familias que, superado este prazo, están próximas a un funcionamento autónomo ou con apoios normalizados. (1)*

(1) Aínda que o convenio ten duración dun ano, a intervención coas familias leva por termo medio un prazo de 18-24 meses, polo que cada ano, hai familias que continúan do ano anterior e familias novas de alta no programa.

III. SEGUIMIENTO DO PROGRAMA.

Establécese o seguinte mecanismo de reunións con achega de documentación entre o equipo que coordina o programa e o equipo competente en materia de protección á infancia, para o pertinente seguimento das actuacións do programa obxecto do convenio:

Trimestralmente: *informe trimestral no que queden detalladas as actuacións executadas en cada intervención e o grao de cumprimento acadado en relación cós obxectivos recollidos no Plan de Actuación do que se trate, con achega de copia das follas de seguimento trimestral e resumo estatístico.*

Anualmente: *achega da memoria anual do programa que reflectirá os datos cuantitativos e cualitativos, o volume de poboación coa que se traballou nas distintas áreas do programa, os resultados conseguidos e a análise dos mesmos e aportará a análise do perfil familiar para un mellor coñecemento das situacións de risco de desprotección que permitan contribuír á mellora continua das actuacións. Entregarase ao longo do mes de febreiro posterior ao ano do que se trate.*

Puntualmente: *cando se estime necesario comunicación presencial, telefónica ou correo electrónico para resolver calquera cuestión relacionada co desenvolvemento do programa.*

